

Pānuitanga Pāpāho

He haurua te maha o ngā kaimātaki kanorau ka karo i ngā pāhotanga nā te ūtonga o ngā kaupapa

He tokomaha te iwi o te hapori kanorau ka karo i ngā pāhotanga tūmatanui nā ngā kaupapa mōrihariha, ūtonga hoki, te kitenga o te rangahau hou a Te Mana Whanonga Kaipāho.

Neke atu i te toru hauwhā o te Māori (79%), ngā Iwi o Te Moana-nui-a-Kiwa (85%), Āhia (76%) me ngā Muharama (75%) i uiuitia e te BSA i whāki ake i te raru nui ki Aotearoa nei te whakaraeraetanga ki ngā kaupapa mōrihariha, whakatoihara, tautohe rānei.

He āhua hautoru o te Māori, ngā Iwi o Te Moana-nui-a-Kiwa me ngā Muharama, me te 21% o ngā Āhia kua pānui, kua kite, kua rongo rānei i ēnei momo kaupapa e whakatairangatia ana i ngā mārama e ono kua hipa. Ko ētahi taura o ēnei, ko te whakaoho i te taututenga, te whakaū i te arotoka, ngā kōrero horihori, ngā pūrongo haukume me ngā kōrero whakakata, ngā kōkiri rānei ko ngā rerekētanga o ngā tāngata te pūtake.

Neke atu i te haurua e kī ana, ka karo rātou i te mātaki, te whakarongo rānei ki te pouaka whakaata, te reo irirangi rānei nā te nui o te kōrero horihori me ngā kaupapa kāore i te tika (Māori 55%, Moana-nui-a-Kiwa 50%, Āhia 52%, Muharama 52%).

Heoi anō ko ngā pae pāhopori te pae nui e puta ai ngā kōrero mōrihariha (e kīia nei he kino rawa), whai muri ko te pouaka whakaata koreutu me ngā pae rongo kōrero tuihono.

He tokoiti noa te hunga i uiuitia, i whakaaro ake he pai te tautika o te tikanga manawhiri kōrero, me te tūponotanga o te kino, otirā he nui te hunga e kī ana me whakataurite te tikanga o te manawhiri kōrero me te hiahia ki te whakaute i ngā whakaaro o ētahi atu.

He wāhanga ēnei kitenga o te rangahau hou a te BSA* ki ngā pānga o ngā momo whakaaturanga mō ngā hapori kanorau, me te pai o te tiaki a te tikanga paerewa pāpāho i ēnei hapori.

Ko ētahi atu kitenga kei roto:

- He tokomaha tonu te hunga o ia hapori e whakapono ana kia kaha ake ngā here o te manawhiri kōrero hei aukati i te kino (Māori 56% Moana-nui-a-Kiwa 60% Āhia 45%, Muharama 41%).
- Ahakoa e kitea ana ko ngā pae pāhopori te mātāpuna kino rawa o ngā kōrero mōrihariha, e taunakitia ana tēnei e ngā arapāho auraki, otirā kei te whakamanahia e rātou. Kei te akiakihia e te "āhuatanga muna" o ngā kōrero reo irirangi me ngā pae pāhopori ngā whakaaro angahāruki.
- E whakaae ana ngā rōpū aronga he iti noa ētahi o ngā āhuatanga engari nā te whānui o te horanga o ēnei mea iti, kua whakatōpūtia hei āhuatanga tūkinu rawa.
- He nui te hunga e whakatakariri ana, e pāmamae ana rānei i tēnei. E tohu ana ngā kaiwhakauru ki ngā pānga whānui pēnei i te taunoatanga o ngā whanonga kino/arotoka; te tūrakitanga o ngā wawata; te noho whakawehi, te whakawāhia e tētahi atu, kāore rānei i te 'whai tūranga'; tae atu ki ngā pānga ki tō māiatanga, te hauora hinengaro me te kiritau.
- Engari, ko ngā whakaro hoki o tētahi wāhanga nui o ia hapori, "me āhei tonu te tangata ki te whakaputa i ō rātou whakaaro i te mea ka taea e koe te whakaweto i te hōtaka, te aro kē atu rānei".
- Ko te urupare ahuwhānui ki ngā whakaaro mōrihariha nei ko te kōrero ki ngā hoa/whānau, me te tuku amuamu i muri iho ki te kaiwhakapāho, te tuku tākupu tuihono, amuamu rānei ki tētahi tari kāwanatanga (ko te wāhi tuatahi ko Te Kāhui Tika Tangata e whakapāngia ai e te tokomaha, i

muri ko te BSA).

- Ko ngā pānga whaiaro, tae atu ki te tūpono riri, tūkino rānei ki ō rātou whānau te whakahihihikotanga nui o te tuku amuamu.

Hei tā te Tumu Whakarae o te BSA a Stacey Wood, he āhuetanga pōuri te kite i te nui o ngā whakaaro riri, pāmamae, whakaparahako rānei i pupū ake i ngā kōrero kino puta noa i ngā pae pāho maha.

"Nā ā mātou rangahau, e kite ai mātou i ngā tirohanga ohooho ki ngā wheako o ēnei hapori o te kino, me ō rātou whakaaro ki te nui o te mana kei te manawhiri kōrero i roto i ngā horopaki rerekē. Ka whaihua ngā kitenga nei ki te whakamōhio i ngā whakatau anamata a te BSA.

"Mā ēnei hoki e ara ake ētahi take hōhonu hei urupare mā ngā whakahoutanga ki ngā waeture ā-kaupapa, tae atu ki te hiahia ki tētahi tikanga e whakatau tika ana i ngā pae pāhopori - otirā he ara matua tēnei o te tuku haere i ngā kaupapa mōrihariha. Me whai whakaaro hoki ngā whakahoutanga anamata ki te pānga whakatōpū o ngā kaupapa mōrihariha, me te whai anō ki te whakatau i ngā take nahanaha.

"Arā kē atu ngā rangahau e miramira ana i ngā māharahara o te hekenga o te pono ki ngā arapāho, nā tō mātou ake uiui nei e whai tirohanga ai mātou ki ētahi o ngā kaupapa whakaraerae pea o te pono me te whai wāhitanga ki ngā kaupapa i roto i ngā hapori i uiuitia e mātou. I tū tētahi wānanga ā-motu i tērā tau, i whakahaeretia e te rāngai mahi tonu, i whakahuihui ai i ngā kaiārahi arapāho me ngā hapori ki te kimi huarahi ki te hiki i te pono ki ngā rongo kōrero, mā te hiki pea i te kitenga o ngā iwi maha, otirā he huarahi whaitake - engari ko te kōrero a ēnei kitenga, he tawhiti tonu te haerenga hei whai," hei tā Wood.

E wātea ana te pūrongo rangahau katoa i te paetukutuku a te BSA [i konei](#).

MUTUNGA

* I whakahaeretia te rangahau nei mā te BSA e AK Research and Consulting ki te tūhura i ngā whakaaro me ngā wheako o ngā hapori Māori, Moana-nui-a-Kiwa, Āhia me te Muharama o Aotearoa. I tū ngā whiriwhiri kōrero tuatahi ki ngā rōpū aronga mai i ēnei hapori, otirā i whakamahia ēnei kōrero ki te whakamōhio i te uiui tuihono whānui ake i puta i muri iho, i uiui i ngā mema 493 o ēnei hapori. I whakahaeretia ngā kohinga rangahau i te 8-15 o Āperira me te 2-16 o Mei 2024.

Ko te pae hapa o ia tīpakohanga mō te 50% i te kaupae māiatanga o te 95% he: Māori +/- 7.9%; Moana-nui-a-Kiwa +/- 8.0%; Āhia +/- 7.3%; Muharama +/- 10.0%.

Tuhipoka

MŌ TE MANA WHANONGA KAIPĀHO

He hinonga Karauna motuhake te BSA e whakahaere ana i ngā paerewa whakapāho o Aotearoa. Ka whakatau te BSA i ngā amuamu kua takahia e ngā whakapāhotanga ngā paerewa, ā, ka whakahaere rangahau, ka tiroiro hoki i ngā paerewa whakapāho i runga anō i ngā whakawhiti kōrero ki ētahi atu kaiwhakapāho.

Whāia mai i runga o Twitter [@BSA_NZ](#) i runga rānei o [LinkedIn](#)

Mō ētahi atu mōhiohio tirohia tā mātou pae tukutuku: www.bsa.govt.nz